

## REGIONAL NEWS

HEADLINES:-

1. Chief Minister Pu Lalduhoma'n Aizawl khawpui atanga Assam Rifles sawn chhuah hna chu Union Home Minister-in kum khat chungga zawh theih a ni tih a sawi thu House a hrilh.
2. Horticulture Department Minister Prof Lalnilawma'n sawhthing chu sawrkarin loneitute dawrin a lei dawnlo a, a leitu turte leh a chingtute indawrna tur a ngaihtuah sak dawn a ti.
3. President Draupadi Murmu-i chuan khuarel chhiatna avanga mihring nunna chan an tlem theih nan khawchin thlirlawkna tha leh dik zawk a awm a ngai a ti.
4. Kolkata-a doctor hmeichhia pawngsual leh thah thubuai a ngaihtuahnaah Supreme Court chuan medical lama eizawngte himna pe tur national task force a din.

&lt;&gt;&lt;&gt;&lt;&gt;

CM ASSAM RIFLES

Chief Minister Pu Lalduhoma'n Aizawl khawpui atanga Assam Rifles sawn chhuah hna chu Union Home Minister-in kum khat chungga zawh theih a ni tih a sawi thu House a hrilh.

Chief Minister Pu Lalduhoma chuan Hachhek bialtu MLA, Pu Robert Romawia Royte zawhna sawi zuinaah AR chhuah dan tur chungchanga inremna thuthlung, MoU chu sorkar hmasa leh Assam Rifles-te'n a hran hran ve vea an neih chu a hlawhtlin loh avangin sorkar thar hnuaiha ama kaihhruainain ngaihtuah that leh a ni tih a sawi a, an inrem lohna laite sawiho mah se an chingfel mai thei lo a, hemi hnu hian Home Ministry kaihhruaina hnuaiha chingfel thuai a rawtna chu sorkar laipui chuan kar khat chungga tihfel an tum thu an hrilh thu a sawi.

Hetihlai hian AR lamin an MoU an ziah that an nghak leh a, sorkar laipui lam thu a hmuh chu a khawtlai ta tih sawiin, waviin thlengin sorkar laipui hmalakna erawh a la hlawhtling lo a ni, a ti a, tuna an nghah chu MoU sawifel a nih thu sawiin, Home Minister sawi dan chuan, AR sawn chhuah hna chu thla thum dan zelah kalpuiin, kum khat chungga chuan AR insawn chhuah chu zawh fel theih a ni ang tiin a hrilh thu a sawi a ni.

Pu Lalduhoma chuan Assam Rifles insawn chhuah avanga Zokhawsang hmuna loneitute harsatna chingfel turin Mizoram sorkar chuan AR-te nen inbe remin feh kawng thar lai turin ruahmanna siam a nih thu a sawi bawk a ni.

&lt;&gt;&lt;&gt;&lt;&gt;

HOME MINISTER

Home Minister Pu K. Sapdanga'n Mizoram leh Assam-te'n ramri an tih ve ve a inan loh avangin ramriah harsatna a thleng thin tih House a hrilh.

Waviin sessionah zawhna chhangin Home Minister Pu K Sapdanga chuan tun hnaiah Mizoram leh Assam ten ram neitu zawk nia an inchhal ve vena hmunah Assam Sorkar-in Assam Police Camp panna tur kawngah hma an la tih Mizoram sorkarin a hria a, Kolasib District thuneituten a hmunah kal chilh nghalin, an hna leh an hmalaknate chawlh tir nghal tura hriattir an ni tih a sawi a ni.

Zawh belhna chhangin state pahnihte'n ramri an tih ve ve a inan loh avanga harsatna thleng thin a nih thu a sawi a, hemi avanga state pahnihte'n ramri a

kutthlak lo tura status quo kalpui mek a nih thu sawi bawkin, hetihlai hian ramriah kutthlakna a awm leh thin avangin sorkar chuan inbiakna a kalpui chhunzawm tih a sawi. ZPM sorkar atangin CM level-ah inbiak tan a ni a, chumi bawhzui chuan tun hnaiah Aizawlah Minister level a inkawmna pawh neih a ni, a ti a, heta an thu dah angin, sorkar hotu Secretary level-ah pawh inbiak chhunzawm zel turin thu an dah ta tih a sawi a ni.

<><><>

#### MZP

Mizo Zirlai Pawl vawiina thukhawm chuan Chakma khua Borapansury-ah Mizo Police pahnih ten Chakma Nuho (Mohila) kut an tuar ni a sawiin, kut thlaktute zawng chhuaka case siam sak turin Sawrkar a ngen.

MZP thuchhuah tarlan danin Mizoram chung ngeiah Mizoram Police te an him lo leh kut an tuar chu hriatthiam har an ti a. Mizo Police kut thlaktute zawng chhuaka case siam sak turin Sawrkar a ngen tih sawiin Pawi khawihute case siamsak an nih hma chuan Chakma te an sa him nan pawn chhuak lo turin an hriattir nghal tih an sawi bawk.

Thudawn danin nimin tlai thimhlim khan Borapansury OC SI Clifford-a leh a nau constable Zothansanga te chu Chakma hmeichhia ten thingfakin an vuak rawn a, hliam tuarin Tlabung lam pan pui an ni a, ngaihtuahawm an ni niin thudawna chuan a sawi.

Borapansury OC SI Clifford-a hian nimin khan lawngleng chu tuiah an ti pil palh a, an hnuh chhuah hnua chakma nu ho in lawng a chhia tia thinrimin an inpunkhawm an ti a, thinrim pungkawm chuan SI Clifford-a leh a nau constable Zothansanga te chu thingfakin an vua niin thudawna chuan an sawi a ni.

<><><>

#### ASSEMBLY OBITUARY

Mizoram Legislative Assembly pakua na thutkhawm vawi 3-na ni khatna chu vawiin khan Speaker Pu Lalbiakzama kaihhruiin tan a ni, session hnukung ber leh tun session inkara member thi Pu Kapoor Chand Thakuri sunna hun hman a ni.

Chief Minister Pu Lalduhoma chuan Mizoram sawrkar leh Mizoram Legislative Assembly in Pu Kapoor Chand Thakuri chu ram leh hnam tana a hnathawh a chhuangin an ui takzet a ti a, Opposition Leader Pu Lalchandama Ralte pawhin ram rorelna bultantu anih angin a ui thu a sawi bawk.

Pu Kapoor Chand Thakuri hi kum 1972 a Mizoramin UT a nih ruala assembly a neih khan Pi Saptawni leh Pu Lalhmingthanga te nen ruat seat-ah, khatih lai a Mizo Union sorkar khan a dah a ni a. Kumin July ni 15 khan Nepal khawpui Kathmandu-ah a thi a ni.

Vawiin session tanni ah hian sawrkar dan dinglai siamthat tur rawtna 2 pawm a ni.

Session ah hian Sorkar atangin dan siam tura duan 5 a lut a, Assembly secretariat atanga thudawn danin dan thar siam tur 1 leh dan dinglai simthat tura rawtna 4 lutin House chhunga chhan tur chi (starred question) 263 leh ziaka chhan chi (unstarred question) 17 a lut tawh bawk a. Hei bakah hian Social Welfare & Tribal Affairs minister Pi Lalrinpuii hnen atangin official resolution putluh tur an dawng tawh bawk.

<><><>

## Horti Minister

Horticulture Department Minister Prof Lalnilawma'n sawhthing chu sawrkarin loneitute dawrin a lei dawnlo a, a leitu turte leh a chingtute indawrna tur a ngaihtuah sak dawn a ti.

He thu hi vawiin Assembly thutkhawma zawhna leh chhanna hunah sawiin Minister chuan sawhthing chingtuten an hralh theih nan sawrkarin theihtawp a chhuah a ti a, sawrkar chu a leitu ah tang lo in an indawrna tur lo ngaihtuah sak tu tur ani dawn a ti a, a chingtuten tha taka an hralh theih nan theihtawp an chhuah tih a sawi.

Minister chuan Mizoram chhungah sawhthing mi 20,102 in an ching mek tih sawiin tun dinhmunah sawhthing tam 6586 report an dawng a ti a, department in sawhthing tam buaipui turin chak takin hma a la mek a ti a, society khaw tinah din ani tawh tih sawiin chak zawka hmasawna a awm theih nan an bawhzui mek tih a sawi.

Prof Lalnilawma chuan State pawn atanga thlai leh thei lakluh leh endik chu Horticulture Department hmalakna hnuaiah a awm loh avangin a him leh him loh endik chungchangah Horticulture Department chuan hriat a nei lo a ti a, Thlai leh thei lak luh him leh him loh endikna Pesticide Residue Analysis Laboratory siam tura hmalakna duanchhuah chu thil tha tak a ni a ti bawk.

Mizoram chuan Mizoram thlai thar 4 – sawhthing, hmunphiah, hmarcha leh aieng te chu Research nena kalpui mek ani tih sawiin thlai leina turin sawrkarin rate a siam tawh a ti a, sawhthing chu cheng 50 aia tlem loa lei tura ruahman ani tih sawiin hmunphiah chu cheng 100 leh cheng 80 in lei ani dawn tih a sawi bawk.

Minister chuan RKVY hnuaiah Mizoram Vety College in project kum 3 chhung an buaipui hnuaiah thlai thar state dang atanga lakluh test vek theih tura ruahman ani a ti a, hemi buaipui nan cheng vbch 11.8 an sanction a ti a, first installment ah 2.65 crore hmuh tawh ani tih sawiin hei hian nasa takin hmun dang atanga thil tha zawk lakluh kawngah a pui dawn niin a sawi bawk.

<><><>

## RAIN HAVOC

Mizoram sawrkar chuan ruahsur chhonzawm zel avang leh khaw awmdan in that lam a pan loh avangin vawiin khan Aizawl District chhunga zirna in hrang hrang te chawlh a puang a.

Ruahsur nasa hian khawsak phung ti khaihlak nualin, sumdawna hmun leh sorkar pisa te erawh dan pangngaiin a inhawng a ni.

Nimin atanga chawl loa ruahsur hian hmun hrang hrangah tuilian a siam nasa hle a, District pathum – Aizawl, Champhai leh Mamit ah chhian thlengin mihring thi leh hliam erawh an awmlo a ni.

State Disaster Department atanga thudawn danin Aizawl khawpui chhungah Ngaizel, Chaltlang Lily veng, Edenthar Vengchhak, Chanmari West, , Bungkawn leh Chawnpui vengah te leimin avangin kawng a ping rih a, Bung Bangla ah pawh lung tla in kawngpui hnawh phuiin Govt Complex ah leimin vangin chhungkaw 3 chu hmun him lama thiarchhuah an ni.

Champhai District ah chuan Chhangphut field, Govt. Champhai college road ah leimin awmin hemi vang hian kawng a ping rih a, Champhai leh Aizawl inkalpawhna kawngah pawh leimin hi awmin hnathawktuten an thian fai mek a ni.

Mamit District ah chuan West Phaileng atanga Dapchhuah panna kawng leh West Phaileng RD Block, Hnahva ah leimin a awm a, thawktuten thianfai mekin kawng hi a la tlang rihlo a, NH 44A Mamit leh Aizawl inkalpawhna pawh leimin vang hian a ping rih a, thawktuten thenfai hna an thawk nghal bawk a ni.

<><><>

#### CHILD RIGHTS

Mizoram State Commission for Protection of Child Rights (MSCPCR) chairman Pu Jimmy Laltnanmawia'n naupang pawikhawhtute laka mipui nawlpui rilru puthmang siamthat a la ngai nasa hle a tii.

MSCPCR hotute chuan vawiin hian Aizawl Press Club-ah thuthar thehdarhtute kawmin an hmalakna leh mawhphurhna hrang hrangte an tarlang a, he hunah hian an chairman Pu Jimmy Laltnanmawia chuan Mizoram mipui nawlpuiin naupang enkawlina kawngah hma an sawn laiin hmasawanna tur a la tam thu a sawi a, naupangte humhalhna Dan tha tak tak te chu naupang ti hlulangtu leh ti pawngpawrhtu ang deuha ngai an la awm chu a dik lo tih sawiin, naupang kum 18 la tling lote chu pawh an khawih a nih pawhin 'hrem tur an ni lo va, siamthat tum tur an ni' tih hi khawvelin a pawm dan leh tuna Dan hmanlai-in a tum ber pawh a ni, a ti.

MSCPCR hi India Parliament-in "The Commission for Protection of Child Rights (CPCR) Act, 2005" a pass anga dan-in a phut angin kum 2018 khan din a ni a, naupangte dikna chanvo humhalhna dan chi hrang hrang kenkawh dan vil zui te, a tul apianga sorkar thurawn pekte chu State Commission din chhan ber a ni tih an tarlang bawk.

<><><>

#### PRESIDENT MURMU

President Draupadi Murmu-i chuan khuarel chhياتna avanga mihring nunna chan an tlem theih nan khawchin thlirlawkna tha leh dik zawk a awm a ngai a ti. Vawiina National Geoscience Award semna Rashtrapati Bhavan-a neihah he thu hi sawiin President Murm-i chuan khuarel chhياتna hrang hrang leimin leh tuilian avangtein ramchhung hmun tam takah chhياتna a thleng a ti a. Pi Murmu-i chuan Kolkatta-ah National Landslide Forecasting Centre din anih thu sawiin leimin hlauhawmna state hrang hrangahte inralrinna tur a thawn thin a ni a ti.

Vawiin inkhawmah hian President Murmu-i chuan geoscientist 21 te hnenah National Geoscience Award a hlan a ni.

<><><>

#### SC ON KOLKATTA DOCTOR

Kolkatta-a doctor hmeichhia pawngsual leh thah thubuai a ngaihtuahnaah Supreme Court chuan medical lama eizawngte himna pe tur national task force a din. Chief Justice DY Chandrachud-a kaihhruai bench chuan task force te chu kar thum chhunga an report lailawk thehlut a, thla hnih chung ngeia a kimchang thehlut leh turin a ti a. National Task Force chuan rampum huap tur hmeichhiate himna tura inkaihhruaina an ngaihtuah dawn a ni. Doctor leh medical lama thawkte himna turin tuna dan chu a tha tawh lo niin court chuan a sawi a. TUna doctor hmeichhia pawngsual leh thah anih chungchangah pawh court-a thubuai thehluh a awm hmain ama thu in Supreme court chuan hma a la a ni a ti a.

<><><>

## PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>